

Ekološke organizacije nastavit će da se bore protiv izgradnje malih hidroelektrana na rijekama Balkana, zaključak je predstavnika ekoloških organizacija iz cijelog regiona, na sastanku koji je proteklog vikenda održan u Banjoj Luci.

-Dokazujemo da male hidroelektrane nisu društveno, ekološki, ali ni ekonomski prihvatljive i opravdane, te ćemo nastaviti podržavati lokalne zajednice koje se bore protiv ovakvih projekata kao što je slučaj rijeke Doljanke - istakao je Viktor Bjelić iz Centra za životnu sredinu.

Iz Centra tvrde da su „rijeka u Bosni i Hercegovini, kao i ostalim zemljama Balkana, pod velikim pritiskom i prijetnjom od izgradnje malih hidroelektrana, a aktivisti koji se bore za njihovo očuvanje često su pod pritiscima i napadima investitora i njima bliskih struktura vlasti“. Snaga za odbranu prirode i ljudi je, kako je saopćeno, u solidarnosti organizacija civilnog društva, lokalnih zajednica i pojedinaca.

-Kada smo saznali da će se graditi mala hidroelektrana na rijeci Doljanci u općini Jablanica, nismo ni bili svjesni da je investitor ishodio sve dozvole, a da u procesu javnih konsultacija nije učestvovao niko iz mjesnih zajednica na čijoj teritoriji je planirana gradnja. Koalicija za zaštitu rijeka BiH nam je u velikoj mjeri pružila podršku da se organizujemo i izrazimo svoje nezadovoljstvo ovim projektom. Takođe, iskustva iz Kruščice su nam bila od velikog značaja - rekao je Dženan Šašić, predstavnik Udruženja za Doljanku u osnivanju. Iz Centra tvrde da situacija nije ništa bolja ni u zemljama u regionu. Već duže vrijeme u Srbiji na Staroj planini traje otpor lokalnih zajednica protiv izgradnje malih hidroelektrana u srcu ovog zaštićenog područja. Na sjeveru Crne Gore lokalne zajednice su, kako se dodaje, također ustale protiv ovih projekata za koje tvrde da su izuzetno štetni po njihov način života i potrebe koje oni zadovoljavaju korištenjem svojih rijeka.

-Lokalne zajednice su se organizovale i digle svoj glas protiv ovih projekata, jer su njihova prava i održivi razvoj ugroženi. U BiH su primjeri rijeka Doljanke i Kruščice vrlo slični primjerima na rijekama Komarači, Vinicki i Bukovici u Crnoj Gori, gdje su stavovi i mišljenja ljudi koji žive uz te rijeke potpuno ignorisani. Važno je da se civilno društvo solidariše. Mora se jasno staviti do znanja vlastima i energetske lobije da su male hidroelektrane štetne po prirodu i ljude - naglasio je Aleksandar Perović iz Ekološkog pokreta Ozon iz Nikšića. Sastanku ekoloških organizacija je prethodila prezentacija Analize ekonomske opravdanosti koncesionih naknada i podsticaja za male hidroelektrane u Bosni i Hercegovini.

Ovaj dokument je jasno dokazao da uspostavljeni sistem podsticaja nema ekonomsku opravdanost i da je sa stanovišta društva štetan, jer na godišnjem nivou pravi direktan društveni i finansijski gubitak veći od četiri miliona KM za Bosnu i Hercegovinu - tvrdi se u saopćenju Centra za životnu sredinu Banja Luka.



BiH; Ekolozi iz regiona nastavljaju borbu protiv izgradnje malih hidroelektrana

Izvor: Energetika.ba